


TEZAUUR LITURGIC

24 AUGUST

**ACATISTUL
SF. IERARH-MUCENIC
PROCOPIE
TITOV,
ARHIEPISCOPUL
CHERSONULUI**



MOSCOVA, 2000



Акафист **священномученику Прокопию,** **Архиепископу Херсонскому**

Кондак 1

Избранному на жертвенное служение Богу, ныне у Престола Вседержителя предстоящему священномученику Прокопию благодарственное приносим пение. Ты же, яко имеяй велие дерзновение ко Господу, ограждай нас от всяких зол и обстояний молитвами твоими, да зовем ти: Радуйся, священномучениче Прокопие, Херсонскаго края светильниче неугасимый.

Икос 1

Ангели на небеси возрадовашася зело рождшемуся тебе, святителю Прокопие, в праздник Рождества Христова: ты бо младенческим гласом восхвалив Богомладенца Иисуса, верно послужил еси Ему ангельским житием своим. Мы же, видяще тя, яко избран сосуд благодати Божественныя, вопием ти: Радуйся, в день Рождества Иисусова преславно рожденный.

Радуйся, со Ангельскими чинми Христа
восхваляяй.

Радуйся, Духа Святаго честное вместилище.
Радуйся, законов Божиих благое хранилище.
Радуйся, правде Христовой усердно
послуживый.

Радуйся, службою своею Христа ублаживый.
Радуйся, житием своим Ангелом подражавый.
Радуйся, во Царствии Божии награду стяжавый.
Радуйся, священномучениче Прокопие,
Херсонскаго края светильниче неугасимый.

Кондак 2

Видя велие усердие к познанию богословия,
дарова тебе Господь, отче Прокопие, разумети
Писания Божественныя. Ты же в сердце своем
словеса Христа нося: "Иже сотворит и научит,
сей велий наречется в Царствии Небеснем",
потщался еси поученьми твоими и примером
добрым люди в вере Христовой утвердити,
научая непрестанно пети: Аллилуиа.

Икос 2

Разумом, данным тебе от Бога, уразумел еси
добре, блаженне Прокопие, яко в мире неудобь
обрящещи спасение. Сего ради брака уклонился
еси, единому Господеви благоугождати хотя. Мы
же, умиляясь иноческим подвигом твоим, яко
ангелу поем ти:

Радуйся, явивыйся Ангельским силам светлое
уподобление.

Радуйся, пребывати во святости имевый велие
произволение.

Радуйся, душу свою от соблазнов усердно
хранивый.

Радуйся, в сердце своем Иисуса с любовью
носивый.

Радуйся, чистоту в житии твоём многоскорбнем
всегда соблюдавый.

Радуйся, помыслы суетныя и неполезныя далече
от себе отгнавый.

Радуйся, верность Христу присно сохранявый.

Радуйся, душу свою от пристрастий земных
удалявый.

Радуйся, священномучениче Прокопие,
Херсонскаго края светильниче неугасимый.

Кондак 3

Силу Вышний дарова тебе на служение Церкви,
священномучениче Прокопие, ты бо добре
потрудился еси в земли Томстей и Иркутстей, и
многия подвиги тамо подъял еси, непрестанно
помощи у Господа прося, и воспевая Ему:
Аллилуиа.

Икос 3

Имущеи душу твою присно к Богу любовию
пламенеющую, сан священства приял еси, святе
Прокопие, и помощью Божиею
вспомоществуемый, усердно служил еси алтарю
Господню. Мы же, прославляюще подвиги твоя,
похвальная восписуем ти:

Радуйся, пред алтарем Господним Богу
обрученный.

Радуйся, во священстве благодатию дивно
почтенный.

Радуйся, священством твоим Христу славно
угодивый.

Радуйся, вся службы со страхом и благоговением
совершавый.

Радуйся, пред всеми Христа исповедавый.

Радуйся, Царствие Небесное от Него
унаследовавый.

Радуйся, о душах наших молитвенниче
усердный.

Радуйся, на суде Господнем защитниче наш
верный.

Радуйся, священномучениче Прокопие,
Херсонскаго края светильниче неугасимый.

Кондак 4

Буря ярости воздвижесе на Церковь Христову, егда безбожницы восхотеша разрушити ю. Ты же, святителю Христов, Архиепископом в земли Херсонстей от Господа поставлен был еси, да пасеши словесное стадо, от хищных волков сохраняя е, с ним же благодарственно зывал еси укрепляющему тя Христу Богу: Аллилуиа.

Икос 4

Слышаще и видяще православнии людие равноангельное житие твое, священномучениче Прокопие, притекаху к тебе послушати словеса твоя, да водимии тобою, праведнаго жития достигнут. Мы же, видяще тя украшена смиренномудрием и кротостию Христовою, с радостию зовем ти:

Радуйся, Апостолом на небеси сопричастниче.

Радуйся, Христовым святителем сопрестольниче.

Радуйся, благодетелю наш, предстательством твоим Царствия Небеснаго нас сподобляющий.

Радуйся, молитвами твоими от ада преисподняго души наша спасающий.

Радуйся, молящийся о всех, в помощь ты призывающих.

Радуйся, слышащий всех к тебе с надеждою зывающих.

Радуйся, паству Херсонскую, в гонениях сущую, верною Христу сохранивый.

Радуйся, стаду своему словесному рассеяться не попустивый.

Радуйся, священномучениче Прокопие, Херсонскаго края светильниче неугасимый.

Кондак 5

Боготечную звезду яви тя Господь граду Херсону, святителю Прокопие, ты бо поучении своими паству твою наставляя еси, да вси единым сердцем и едиными усты взывают Спасителю Богу: Аллилуиа.

Икос 5

Видя, священномучениче Христов, како врази Церкви Православныя на агнцы твоя ополчахуса, вся силы своя полагаал еси да ни един не отпадет от стада твоего. Сего ради и пострадал еси, яко добрый пастырь, душу свою за словесныя овцы полагая. Сего ради прими от нас сие усердное славословие:

Радуйся, всех противников на пути к Царствию Небесному победивый.

Радуйся, блаженный небожителю, вечных благ наслаждайся.

Радуйся, Самаго Христа Бога вождем к Небесному Отечеству имевый.

Радуйся, светильниче пресветлый, на церковней свещнице поставленный.

Радуйся, твердый столпе Православия, имже Святая Церковь красуется и укрепляется.

Радуйся, тобою бо слово Христово: "Претерпевый до конца, той спасен будет" - исполняется.

Радуйся, за терпение твое нетленный венец на небеси прияти сподобивыйся.

Радуйся, благами небесными за скорби земныя утешающийся.

Радуйся, священномучениче Прокопие, Херсонскаго края светильниче неугасимый.

Кондак 6

Проповедником воли Божией был еси, священномучениче Прокопие, егда вместо смерти ,тебе предстояция, далече от паствы своя сослан был еси. Ты же, яко агнец кроткий, страдания вся за Христа беззлобно претерпевал еси, воспевая усердно Богу: Аллилуиа.

Икос 6

Возсиял еси, яко лучезарное светило, горением любве твоея ко Господу, архиерею Божий, тако и чада твоя духовная любити Господа и уповати на Него научал еси. Приими же и от наших любящих сердец похвалы сия: Радуйся,

праведному Иову усердный подражателю.
Радуйся, о нас пред Богом верный предстателю.
Радуйся, терпением своим мучителей удививый.
Радуйся, праведным житием твоим многих ко
Господу обративый.

Радуйся, пред всеми небоязненно Христа
исповедавый.

Радуйся, Царствие Небесное верностию Христу
унаследовавый.

Радуйся, ныне на небеси Бога о нас умоляющий.

Радуйся, яко искусный кормчий, к вечному
блаженству нас приводящий.

Радуйся, священномучениче Прокопие,
Херсонскаго края светильниче неугасимый.

Кондак 7

Хотяще вечное спасение получить, всеблаженне
Прокопие, Господу нашему во всем подражал
еси, скорбным путем к Царствию Небесному
шествуя: взем бо иго Христово на себе и
смирению и кротости научивыйся у Него, обрел
еси покой души своей, присно зовущей Творцу:
Аллилуиа.

Икос 7

Новое гонение воздвиже на тя,
священномучениче славне, враг рода
человеческаго, егда гонители Церкви паки

удалиша тя от паствы твоея, первее на Соловки, и по сем на Урал. Ты же, многия скорби перенося в краях дальних, присно в молитвах благодарил еси за вся Благодетеля Бога. Мы же, похваляя страдания твоя, взываем ти:

Радуйся, яко вся искушения в житии твоём добре превозмогл еси.

Радуйся, яко купно со Христом на Голгофу свою шествовал еси.

Радуйся, голод, и мраз, и иныя страдания до конца мужественно претерпевый.

Радуйся, присно пребывати со Христом восхотевый.

Радуйся, светлою свещею во мраце греховнем светящий.

Радуйся, яко светильник в Церкви Православней горящий.

Радуйся, терпению нас научающий.

Радуйся, всех от погибели адския молитвами твоими спасающий.

Радуйся, священномучениче Прокопие, Херсонскаго края светильниче неугасимый.

Кондак 8

Странником и пришельцем в мире сем был еси, святе Прокопие. Господь же, любящая Его любяй, тако устрои, яко да и в заточении службу совершати возможеши, и сим многих утешиши,

вразумиши и наставиши, благодаря за вся благодеяния Христа Бога, и воспевая Ему усердно: Аллилуиа.

Икос 8

Всем сердцем своим и душою возносивыйся ко Господу, егда в заточении службы церковныя совершал еси, святителю Прокопие. Мы же, за таковое твое твердое исповедание Православныя веры ублажая тя, возсылаем ти усердное хваление:

Радуйся, добрый пастырю ищущих спасения.
Радуйся, образе кротости, смиренномудрия и терпения.

Радуйся, гонящим тя вся прощавый.

Радуйся, паству Херсонскую в тяжких лишениях не оставивый.

Радуйся, и ныне со усердием ей помогай.

Радуйся, преодолевати вся препоны вражия ю научаяй.

Радуйся, верный о нас пред Богом заступниче.

Радуйся, теплый о нас пред Спасителем нашим молитвенниче.

Радуйся, священномучениче Прокопие,
Херсонскаго края светильниче неугасимый.

Кондак 9

Всякое естество удивися твоему, священномучениче Прокопие, славному подвигу: ты бо, плоть распяв со страстьми и похотьми, молитвою неустанно отгонял еси вся напасти и искушения, от духов лукавых исходящия. Мы же, тобою научаеми стойко претерпевати вся лишения Христа ради, с тобою купно взываем Ему: Аллилуиа.

Икос 9

Витийства человек, не ведавших истины веры Православныя, словом Божиим отметал еси, досточудне, увещавая паству свою твердо стояти во Православии, не внимая словесем восстающих на Церковь Божию. Сего ради, хвалим тя за таковое твое попечение о спасении душ наших пении сими:

Радуйся, Церкви Христовой светило светозарное.

Радуйся, пастве твоей заступление предивное.

Радуйся, возвеселивый Ангельский чин твоим за Христа страданием.

Радуйся, по Бозе и Богородице все наше упование.

Радуйся, тесным путем к Дому Божию шедый.

Радуйся, благословение Отца Небеснаго наследивый.

Радуйся, Божия милости нам щедрый подателю.
Радуйся, пред Господем наш верный предстателю.

Радуйся, священномучениче Прокопие,
Херсонскаго края светильниче неугасимый.

Кондак 10

Спаستися хотящим и Небеснаго Царства
взыскующим вспомоществовал еси, отче
предивный, верныя чада твоя присно утешая:
ты бо Херсонскою паствою мудро управлял еси и
в заточении далече сущи, и даже до
мученическа кончины твоея не оставил еси ю,
присно наставляя всех на путь спасения и
научая пети: Аллилуиа.

Икос 10

Стена и прибежище был еси чадом твоим,
святителю Прокопие, ограждая их молитвами
своими от всех наветов вражиих. Ныне же,
прославляя святую память твою, усердно молим
тя: предстоя Престолу Творца всяческих,
защищай присно и нас от всякия скорби и
напасти, да умиленно поем ти:

Радуйся, един многоценный бисер, иже есть
Христос, стяжавый.

Радуйся, Его ради вся блага мира сего
презревый.

Радуйся, представши Престолу Господню,
поклонитися Ему сподобивыйся.

Радуйся, на небесех с радостию вселивыйся.

Радуйся, Ангелом и всем святым во Царствии
Божии сожителю.

Радуйся, града Херсона небесный хранителю.

Радуйся, пред Отцем Небесным Христом
исповеданный.

Радуйся, на небеси надеждою вечнаго спасения
обрадованный.

Радуйся, священномучениче Прокопие,
Херсонскаго края светильниче неугасимый.

Кондак 11

Пение ангельское всеумиленно принося в души
твоей, священномучениче Прокопие,
мужественно на смерть со Иоанном пресвитером
шествовал еси. Мы же, взирая на подвиг и
мученическую кончину вашу, взываем ко
Господу: Аллилуиа.

Икос 11

Свет небесный осия души ваша,
священномученицы святии Прокопие и Иоанне,
егда сия вознесени быша святыми Ангелы ко
Престолу Господню. Сего ради, немощный глас
наш ко ангельскому пению совокупив,

восхваляем мученическую кончину вашу и
взываем:

Радуйтесь, в невечернем дни Царствия Божия
водвореннии.

Радуйтесь, славою Божиею на небесех
осененнии.

Радуйтесь, пред Христом Иисусом приснии
наши заступницы.

Радуйтесь, веры Православных неустрашими
исповедницы.

Радуйтесь, во Царствии Небеснем нетленную
часть уллучившии.

Радуйтесь, от Искупителя вечную мзду
приимшии.

Радуйтесь, с небеси на нас присно взирающии.

Радуйтесь, на спасения стезю нас
наставляющии.

Радуйся, священномучениче Прокопие,
Херсонскаго края светильниче неугасимый.

Кондак 12

Благодатию от Бога почтенный, святителю отче
Прокопие, сердце твое сокрушенно и смиренно
соблюл еси. Сего ради молим тя, архипастырю
наш, научи и нас, чад твоих, смиренным
сердцем и сокрушенною душою купно с тобою
славить Бога песнию: Аллилуиа.

Икос 12

Поюще твое ангелоподобное житие и восхваляя мученическую кончину твою, Прокопие всеблаженне, благодарим щедрого и милостиваго Бога, Иже дал есть нам такового крепкаго покровителя и защитника граду нашему. Сего ради, уповая на велию помощь твою, с надеждою взываем ти:

Радуйся, града Херсона милостивый покровителю.

Радуйся, паствы херсонския мудрый святителю.

Радуйся, верныя люди от врагов защищай.

Радуйся, всех от болезней и скорбей присно избавляй.

Радуйся, краю Херсонскому присный предстателю.

Радуйся, благ вечных и временных нам от Бога подателю.

Радуйся, словесному стаду твоему добрый пастырю.

Радуйся, добрый и благий наш архипастырю.

Радуйся, священномучениче Прокопие, Херсонскаго края светильниче неугасимый.

Кондак 13

О преславный угодниче Божий, священномучениче Прокопие, светлый светильниче земли Херсонския! Ныне, восхваляя

святую память твою, молим тя: прими от нас малое сие моление наше и умоли Господа, да милостив будет к немощем нашим и, простив нам всякое прегрешение вольное же и невольное, сподобит нас на Страшнем Суде одесную Его стати и купно с тобою и со всеми святыми в радости нескончаемой воспевати: Аллилуиа. (Этот Кондак читается трижды, задем Икос 1 и Кондак 1)

